



Volume 6, Issue 2

KCCRS Newsletter

Thursday, 15 August, 2019

Kanoana

<i>Te Kamauri</i>	1
<i>Kaongora man NSC</i>	2
<i>Kaongora mai Iroumi</i>	3
<i>Taeka n Reirei</i>	6
<i>Ana Tangira Te Uea</i>	7
<i>Te Maiu ae Tabu</i>	9
<i>Kaubain Nei Maria</i>	10

“....Bobe Pius XII ao e
tia ni katabua te
namakaina ae Aokati”

Kiribati Catholic
Charismatic Renewal
Service

Ibukin am rongorongo, taiaoaka reitaki ma
Uriam Timiti, Teburoburo Eita ao Kautoa
Tonganibeia.

E-mail:
Uriam Timiti - timiti.uriam@gmail.com
Teburoburo Eita - bubblesada.tks@gmail.com
Kautoa Tonganibeia - kautoaj3tki@gmail.com

Te Kamauri



Kam na mauri tariu ao maneu n ana Tangira te Uea. Ti a manga reitira riki ni karaba ao n neboa te Uea inanon te namakaina aio ae Aokati inanon am beba ni kaongora ae Emmanuera. Ti kakaitau riki nakon tamara ae te Atua ibukin ana bai n tangira aika moan te batu ao riki ibukin Natina ae te Rikitemanna ae lesu Kristo ao Nei Maria Tinan te Atua ao tinara naba. Te namakaina ae Aokati ni katoa ririki bon teuana mai ibuakon namakaina aika a rangi ni kakawaki iroun tinara te Ekaretia ba te tai are e a kamoamoaki ao ni baunueanaki iai Nei Maria inanon te mimitong, te karatia ao te itiaki.

Nte ririki 1942 ao e a tia Bobe Pius XII ni katabua te namakaina ae Aokati ao ni kaburea te Ekaretia ma te aonnaba nakon Atinibarin Nei Maria ae Immakurata. E bon kaokoroaki te namakaina aio ba te tai ni bubuti



ke kabatian te tataro nakon Atinibarin Nei Maria ae e katiteuanaki nte tangira ae kororaoi ma Atinibarin Natina ae lesu ae moan te tabu. Nte bong ae 15th Aokati ao ti bon kauringa naba iai uotakirakean Tinara Nei Maria nako Kawara, n rabatana ma tamneina ni kaotaki iai ana tokankai Tinan te Atua iaon te bure ao te mate. Ti kaoaki iroun Tinara te Ekaretia inanon te namakaina aio ba ti na kaburei maeura ni koaua nakon Atinibarin Nei Maria ae Immakurata ao ni maeuakina te tataro ibukin kabaran buren aon-

naba ao aia bure raora.

Tariu ao maneu, ngaira ake a tuai n reke ara tai ni kaburei maeura n tatabemanira nakon Atinibarin Nei Maria ae Immakurata, bon aio te tai ae kakawaki ao ti na aki katibanaoka ba ti nang kabouei maeura ao ara tangira ma tinara ae Nei Maria ibukin tangiran te Atua ao kakaraoan Nanona. E akoira ma n tangirira Tinara Nei Maria, ao e anoira n tai nako ba iai tibangara aika moan te kakawaki ibukin te Atua ba te makuri ni kamaeu ibukia tarira ma manera, riki ake a maiu inanon te ro ma te bure.

E kamimi ana Tangira Tinara Nei Maria nakon te rorobuaka temanna ae Zachary King, iaon America ngke e weteia ba e na kaaina ana taanga ni buaka ni kaitara te ro ma te bure ao ana makuri Tatan. Zachary e bon ikawai inanon te maeu n tabunea, ao inanon ririki aika a maiti ao e a tia n riki ba temanna ana ibonga (high wizard) ae moan te rietata Tatan iaon America are e buakana te Ekaretia ni Kiritian ao ni boutoka kabakakia ke tiringaataei (abortion). E rairaki maeun Zachary imuin anganakina te mae ae Nei Maria te Kakai ao e a reke ngkai ba temanna te tataekina Uean te Atua ni kabuta te aonnaba.



A batu kaubain Tinara Nei Maria, ae e kukurei Emmanuera ni manga tibaia ma ngkoe inanon ana beebea aio inanon makoro aika ka-kaokoro. E kan kaongoraei naba ngkami taian bitaki ao baai aika tia n riki inanon namakaina aika nako, riki mai imuin te Toa ae Bentekota.

Bon ana katekeraoi Emmanuera nakoimi taan wareware, ao ara tataro ba e na uaana ka-noan Emmanuera n te namakaina aio ao e na reke ba manga kakorakira inanon te ririki aio ao kaboauan ara kekeiaki n tangira Atuara ao n irira Tinana ae Nei Maria. Kam raba ao ana kaka-baia Te Uea iaora ni kabane. Alleluia!



Kaongora Man NSC

Kaongora Man Aobiti NSC

Teretia Ioane, NSC Office

Ai bon banan NSC aobiti ni kamauri ngkami tarira ao manera ake a reke ami tai ni wareware n ara beebea ni kaongora aio. Ara kantaninga ba a na rangi ni bati tibangami aika a na reke man Emmanuera are e na kona ni biti maeumi ao man kabwebwerakea riki aron maiuakinan te Maiu ae Onraken te Maiu. Aio bon te kaongora man te NSC aobiti i nanon te ka-3 ni kuata n te ririki 2019.

Bentekota 2019

E korakora te nano ni katauraoi irouia kain ara botaki ae te Kiribati Catholic Charismatic Service (KCCRS) ni kakatauraoi i main te Toa ae te Bentekota are e karaoaki i Santo Betero Church i Ambo. E moanaki te kabane man 6 - 9 June n te maneaba i Beteriin Ambo irouia ara koraki. Iai aika a ririanna i aan ae a aikoa reke nneia i bukin aki taun buburan te maneaba. E ngae n anne ao te koraki ake a ririanna a boni keiaki naba ni kaei taian waaki ake a tia ni baireaki man te NSC riki i aon te reirei ao kawain te kaibangaki ao tabeua kanoan te program ni bong akanne. E moanaki te reirei man 6 - 8 June 2019. E kairaki te moan reirei are n te Kaabong 6 n Tuun 2019 ioun Uriam Timiti mai Bikenibeu Parish, te kauoua n reirei 7 n Tuun 2019, e kairaki ioun Ioane mai Teaorareke Parish, ao te katenua n Reirei are te Kaonobong, 8 June 2019 e kairaki ioun Tiribo Tabanga mai Betio Parish.

N te tai aei naba ao iai te kainaomata are e karaoaki ni karangainan te Tabati 9 n Tuun ao e nakon teningaun tabun tarira ma manera ake a kainaomataki. E raba te Uea ba e teimatoa te akawa irouia tarira ma manera ake a tia n nora boton te Maiu n te Botaki aio ni manga tibaia riki man akawaia te koraki ba a na rinnako n ara botaki. N te kabanea ni bong are ai bon Toan te Tamnei ae Raoiroi, te Tabati 9 n Tuun 2019, ao e a nako kain te katauraoi n aron katikiraoan te Umantabu, tinanikuna ao nanona. E raba te Uea ba e baiti te makuri n aron noran baai aika a rawata are e a bon kabebetea man katiai baai ni kabane. Kanoan te tutia, e tibatibaki irouia baeriti aika teniuia ao n karaoaki te tutia ioun ara Tama ae karineaki Fr Koru Tito. A rangi n tangiraoi taian uakarea ma uaboki are a maieakinaki n te aro are e a bon ringa te nano.

Rineaia kain te NSC

E kairaki te rinerine n Tamnei i bukin te Taibora are mai Eta (NSC) ioun Fr Koru. A kabenakoi aia Aara baeriti aika teniuia n te tai aio n aron ana baire Fr Koru i bukin aara aika a na

rineaki mai buakoia n te Rinerine n Tamnei kain te Taibora mai Eta, te NSC (National Service Committee).

E karaoa te tataro Fr Koru man irianaki ma te nebonebo ni wetean te Tamnei ae Raoiroi ao a bane aara ni katokaki i aon te Baonikarea, ao ake a reke imwin te rinerine n Tamnei n te tai aei bon aikai araia:

1. **Taaketei James - Tia Babaire**
2. **Terira Birikarere - Ka-uoman**
3. **Kauanako Bangao - Tia Koroboki**
4. **Kautoa Tonganibeia - Tia mane**
5. **Makurita Baaro - member**
6. **Rokonraoi Beeni - member**
7. **Mrs Akineta - member**

Ti karaba ana rinerine te Tamnei ae Raoiroi n noran rineaia kain ara Taibora mai eta ngkai ti noria ba a bane n iai kain baeriti aike tenua n te rinerine.

Ana Rekenibong ni Berebitero Fr Koru Tito

E korakora te ang ao te kukurei ae tabangaki n ana koronririki ni berebitero ara Tama ae kari-neaki, Fr Koru are e katauraoaki irouia baeriti aika teniuia ao ni karaoaki n 26 n Tuun 2019. E bakara raoi ana bong aei Te Tama Koru n 20 n Tuun ma i bukin angabuakan ana bong aei ma taben te Tama ao ngaia are a bonnanoia kain te Taibora are mai eta (NSC) ba e na karaoaki kauri-gaan ana bong n 26 n Tuun 2019.



E karaoaki bukamaruan ana bong te Tama n Santo Ioteba maneaba i Teaorareke n taian anene, maie, ua keeke, ma choir ao ai amarake ma kaka temanna beekina man baeriti aika teniuia (Betio, Teaorareke, Bikenibeu). A roko n te tai anne iruwa man baeriti, makoro aika a ka-kaokoro ao ai te Minita man te Onaoraki ma kain abana ao ai te Speaker naba ma kain abana.

N ana maroro te Minitia Hon. Tauanei ao e kamoamoa aron te nanomaka ao te nanomatao n noran ana makuri te Tama Koru are e a tia n taua nakoana ma te kakaonimaki i nanon te maan ae 32 te ririki. E reitia man kamoamoa ana kakamakuri te botaki n tataro ae te Charismatic ngkai e noraki aron kakamakurina i nanon te Ekaretia Katorika i bukin uouotan te Rongorongo ae Raoiroi are e na kona ni buoka naba uarokoia kain Kiribati nakon te maiu ni Kiritian ao te rau

nakoia utu ao ai bon nakoia naba ara botanaomata i aon abara ae Kiribati. E taekinna naba ba e nora te maiti n te rororrikirake n te botaki aio ao e kukurei ni kaotia ba iai ana kataratara te Tautaeka naba i bukia rororrikirake ni katamaroaan riki te rikirake irouia koraki aikai. E moanaki te botaki n te aoa itiua (7.00 p.m.) ao e bara n te aoa tebwi ma teuana (11.30 p.m).

Te Mamananga nako aonnaba

E teimatoa te bubuti mai aonnaba n tangirakin kawarakia irouia kain te NSC ao kain te charismatic i aon Tarawa i bukin te boutoka i aon te anga reirei, te reitaki n tataro ao ni karina riki te ang ibukin te korakora ao kamatoan riki aia atatai n aron ana waaki te Charismatic.

Iai te kiba nako Nikunau, te nako Aranuka ao Tabiteuea North. Aikai abamakoro aika a tia ni matoa ba a na kawaraki n te kuata aio irouia kain te NSC ao tabeman man baeriti mai Bikenibeu, Teaoraereke ao ai Betio.

E a moana ana waaki te CHARIS ibukin te Charismatic Renewal n te Katorika

Ni moanaki man Bentekota n te ririki aei 2019 ao e kamatoa Bobe Francis moan tein te rabata ae bou ibukin tararuan te charismatic renewal i aonnaba ae CHARIS are bon te kuarereke ibukin bota taeka aikai: **Catholic Charismatic Renewal International Service**. Aio bon te

renewal n te katorika e na riai ni boboto iaon kari-kirakean itera aikai:

1. Te tauraoi n tibatibai karea ma karatia aika ti anganaki inanon te bentekota ke te batbitoaki n te Tamnei ae Raoiroi ke te kainaomataaki;
2. Te ibuobuoki ni karikirakea rabatan lesu ae te Ekaretia, ao bobotakia tan onimakina lesu;
3. Te ibuobuoki nakoia ake a rangi ni kainnanoa buokaia n rabataia ao n tamneia n reitaki ma muiokoan te Ekaretia ni kabuta te rongorongo ae raoiroi.

Maoton-te-Manga

E noraki te iburoki ngkai ni kan katiaan te makuri i Maotontemanga, riki ni katian te makuri ni katikan baibu aike a bubura man te maniba are n aia tabo Tiina i Abaokoro ni katikaki nako Maotontemanga. Ngkana arona ba e tia te project aio ao e na rangi n tikiraoi i bukin Maotontemanga i bukin te mooi te ran, te tebotebo ao kabonganakina aika a rawata ngkai e roroko tarikan te tabo aei, riki ngkana e aki babaka te karau.

Te karabaraba nakon temanna kain te Works Kireua Bureimoa are ngaia are e ibuobuoki n te itera aio n anganga ana kainibaire are e na riai ni karaoaki nako iai te makuri.

Aron maiuia kain te tabo aio, e roroko man baeriti aika teniuia (3) Bikenibeu, Teaoraereke ao Betio n aia anganano ibukin te kamaiu nakoia taan makuri n te tabo aei ma aia tia kuka man katio nakoia taan makuri. Ngkana iai rimwin te kaako i bukia ara koraki aikai, ao e bonobono moa iai te NSC ni kanakoi kaako i aan norakina ae e riai ba e na aki tatara kanaia taan makuri ikekei.

Kaongora Mai irouumi

Ana riboti St Faustina, Betio Parish

Teburoburo Eita, Tlibi Riita

Kam na bane n mauri tariu ao mane u n ana tangira te Uea.

E korakora te kariaria irouia kain St Faustina Charis mai Betio i main Bentekota are kauringaki n te Tabati 9 Tuun 2019. I bukin ara katauraoi ao e karaoaki naba te reitaki n Novena nakon te Tamnei ae Raoiroi ruaia (9) te bong i main Bentekota. E wakinaki naba taian rei anene ba kanoan naba ara tutia n ikotaki ma bon taian katauraoi i bukin te rereua are e na karaoaki n te tai anne. Ngke e a kaan te tai anne ao a rin ara koraki i Beteriin n reitia taria ma maneia man parish aika kakaokoro i bukin te rereua are e waki man te Kaabong 6 Tuun 2019 ni karokoa te Tabati 9 Tuun are ai bongin raoi Bentekota ke ruon te Tamnei ae Raoiroi. A manga bane ni kautaki nanora n ranganakon te karea n te tai anne ao ti a okira ara parish ma te marurung ao te korakora. E boou naba te ang ngkai ti a manga oki ma ara taibora ae boou ba



“..e kamatoa Bobe Francis moan tein te rabata ae bou ibukin tararuan te charismatic renewal i aonnaba ae CHARIS ..”



rabata ae kateia te Bobe ae na anga te ibuobuoki ae tiouataake ke ti teuana ibukin te charismatic renewal n te Katorika i aonnaba. Bon ana kantaning te bobe ba te rabata aio e na bon anga te aro ni ibuobuoki ae bou ao ae e okoro nakon botaki ni charismatic ni kabane i aonnaba ae na karikirakea te reitaki n te nano ae ti teuana (communion). Oin taben te rabata ae CHARIS bon te tia anga te ibuobuoki (service) ao tiaki te tia tautaeka iaon botakin te charismatic renewal. E katuruturu naba Bobe Francis ba te charismatic



*“...SYCHAR ke Tikaa
bon te kawa are e mena
iai ana maniba Iakoba
ao te tabo are e kaitibo
iai Iesu ma ainen
Tamaria....”*

teniman ara taan tei nakon te NSC ba Terira Birkarere, Kuanako Bangao ao Kautoa Tonganibeia. N te Katenibong 12/06/19 ao e a karaoaki rinean ara taibora iaon Betio n reitaki ma taiboran makoro nako irouia kain NSC ao are e a karaoaki n te Kaotitaeka. Kain ara taibora ake a reke n te tai aio bon Teburoburo te tibirita, ara kauoman Nei Francis ara tia koroboki Mikaere ao Nei Mene ara tia mane. A tei naba ara taibora n ara makoro ni kabane ma ai bon ti St Teretia ao te Itoinimarawa.

N te Kaabong 20 Tuun 2019 ao e koro raoi ana ka 31 n iriki n taua nakoana ni Berebitero tamara ae rine Fr Koru Tiito ma e bukamaruaki n te Katenibong 26/06/2019 n St Ioteba i Teaoraereke. E boo atin te bong anne ba a bobonga taian taibora ao n einako ma beekia man parish nako ao e maiti naba taian kanoa ake a kaotaki n te tai anne. A onrake nanora n te kukurei ni manga kaitiboaki ma tarira ao manera ao n reita tamara n neboa te Uea ibukin ana karea ni kabane nakolina ao n teimatoana ma marurungina riki i bukira ngaira kain ana botaki ni charismatic.



N te Kaonobong ae 20 Turai 2019 ao a karaoa aia bowi kain te NSC i Maotontemanga ao are e iraki irouia ara tia tei nakon te NSC n ikotaki ma ara tiibirita. N aia bowi anne are e a kabakaki naba iai arana ni kawai ao ni manga katabuaki ao ni katonuaki arana ae boou ae SYCHAR Retreat Centre. Maotontemanga bon te ara ae aki tamaroa i bukina ba e rangi n rekereke ma baika a ririki i aon te atimakoro anne n taai aika a nako are e a riki ba kanga ai te tabo ni kabae roroa. SYCHAR ke Tikaa bon te kawa are e mena iai ana maniba Iakoba ao te tabo are e kaitibo iai Iesu ma ainen Tamaria ao ni butia nimana te ran. E kaota naba iai nakolina taekan te koburake n ran ae maiu are e na bon aki manga taka ane e mooi iai. Ti bia katoonga te koburake n ran ae maiu, ti bia kaonrakeaki n te Tamnei ae Raioroi n ara waki ni bane mai Sychar.

N te Kanimabong 26 Turai ao e a kaeaki nangin Sychar Retreat Centre irouia kain te moan tiim n rereua aika 15 man St Faustina mai Betio. Ti karabaraba nakoia ara taan reirei mai Teaoraereke parish ni kanoan ara wiken ma te Uea are a kairira iai n te tai anne. E bono kanoan ara tai anne n te reirei ao n te tataro ao ti namakina te kimareirei ao te korakora irouia ara koraki n okia man aia rereua i Sychar.

I nanon Turai 2019 ao iai uoua 2 ara tiim ake a tei



mai Betio n karaoan tibangara aika a kakaokoro ba te tiim nako Nikunau ao Tabiteuea Meang. N Turai 10, 2019 ao a kibanako ara koraki ake a na kaina te tiim nako Nikunau n reita aron te makuri ni kakorakora ao ni kabaroan ana tangira te Uea nakoia kain Nikunau. A okira Tarawa n te Kaonobong 20 Turai. Kain ara tiim ake bon taan reirei mai Betio a kitana Tarawa nako Tabiteuea Meang n te Katenibong 24 Turai 2019 ao a okira Tarawa n te Katenibong 31st Turai. Ti neboa te Uea ngkai a tia ni karairaki ara koraki aikai i muin tian tibangaia are a muikoaki iai.

E ngae ngke e reke te korakora ma te marurung man Bentekota ma e oti ba e bon teimatoa naba te buaka ma te mamara. A na aki kuba nanora n aikai ba bon kanoan te waki ni kekeiaki ma e rai ni kabatiaki te tataro ao te makuri ni kaitarai. E a tia ni bane ara Novena ni kakorakora are ti bane n reitaki iai ao are e na teimatoa n okiokiraki ni katoa namakaina. E iangoaki naba okiokiran te rereua ni bon n ara parish ao i Sychar n angaraoi baai ni kabane. I rarikin anne ao e iangoaki naba te buti n ara makoro nako i bukin kabaroan ana tangira te Uea ma ti a katikui ni kabane na kon taia ao angaia are angaraoi mairoun te Uea.

Riboti mai Gasgony – Buota, Bikenibeu Parish Mariateresa Tauni, Tilbi Riita

Aio ribotin ana makoro Bikenibeu are mai Gasgony nako Buota.

Teuana nakon uoua te wiki i muin te Bentokota ao ti a karaoa ara rinerine ibukin ana taibora te charismatic n ara makoro aikai. Ngai ngkanne are I a reke ba te tibirita n te tai aio, Nei Rereua mai Bonriki are e a reke ba ara kauoman tiibirita, tia mane ae Teweé ao ara tia koroboki ae Nei Kris-tian.

Ngkanne i nanon wakira ao I teimatoa n reitaki ma au makoro aikai ibukin karaoan aia rinerine n aia taibora i nanon aia makoro nako. A bane n tia n tei ara taibora aika a boou ni makoro nako ma ai bon ti Korokota, Peter Tianere ao Bentekota ae a tuai n tei aia taibora. Ngkanne ngkana iai te biribiri i aan makoro ao a babane naba n reke tibangaia man te Emmanuera.

N te tai aio ao bon ti makoro ake iai aia taibora aika a kakaraoa aia reitaki ni katoa Tabati ao Katenibong koraki. N te taina ao I a boo ma Tiebina te tibirita i Eita ma e ira ana aoraki n rin n te onnaoraki. Aio tibangara are ti a onimakina iai te makoro ae Gasgony ngkai e kaan ba e a kakawaria aoraki ni katoa tairikin te Kaabong koraki.

Ti bon teimatoa naba ngkai n iangoa katean aia taibora makoro ake a tuai n tei. E taku te rita mai Korokota are e a tiba oki mai Sychar Retreat Center ba a nang tauraoi ni karaoa te rinerine n okina aei. Peter Tianere a kainnanao kawarakia te buti ni kakorakora n aia tabo ao Bentekota a na iangoa katean aia Taibora ba a maenikun kaina.

Riboti man St Benetito, Tabiteuea Maiaki Parish Tereaua Tewaaki, Tiibi Riita

N tain te Bentekota Tuun 2019, ao e bon rangi n noraki naba te marurung ba a bane n roko kain ara botaki ni charismatic man kawa nako ni bukamarua aia toa ae Ruon te Tamnei ae Raoiroi. A boni bane n roko naba ao ni koro naba bukin tibangaia are a katabeaki iai. Ti karaoa naba te Novena nakon te Tamnei ae Raoiroi i maina. Ao n te Tabati are n tain te toa ao e a karaoaki naba te kainaomata. N tain te nebonebo ao e noraki ba e rangi n rawata te tibatiba n tekennano. Te reirei are e reke n te tai anne bon taekan te ninikoria ba ti na aki maku ni bai ni kabane ba ti ataia ba e a manga roko naba ara tia ibuobuoki are bon Ngaia te tia kakorakoraira n taa nako ao ni bai ni kabanea.

N te tai naba anne ao a rineaki riita aika a boou ni kaboui ara taibora i nuka ao ake inanon kawa nako. Te tiibirita n te tai aio Tereaua Tewaaki, ana kauoman Bura Tetinaniku, te tia koroboki bon Temootu Nakaewekia ao ara tia mane Taanea Taurerei. Ara rita man kawa ngkanne bon Kotee Binoka ma ana kauoman ae Bwabwane Rutia mai Taungaeaka. Ara rita ngkanne mai Buariki bon Naomi Toantarawa ma ana kauoman ae Korere Tetinaniku. Ara rita mai Nikutoru ngkanne bon Rautoka Teatia ma ana kauoman ae Teakoa Teitengaun. Te rita mai Katabanga bon Teebuti Tekaoki ao mai Taku ngkanne bon Teeraa Bwaitongo ma ana kauoman ae Teannako Taabuke.

Ana tangira te Uea ae ti noria n te tai aio ba e rikirake te marurung irouwia ara koraki ao riki man ara kawa ae Nikutoru. Iai naba noran ana tangira te Uea n ana karea are te taotaona n nano nakoira ni kabane i bukin taonakin aia botaki are a bane n tauraoi baina ni kabane. Ngke riki anne ao bon akea naba ae ko noria n un ba a bane n reke irouwia te tataona n nano ao e raba riki te Uea n noran makurin ana tangira nakoira.

E tuai manga waki te katoki aoraki iaan ae bon akea moa aika a wewete ke ni kainnanaoia. I rarikin anne ao ti kukurei ba iai ngkai aika a kooti man te kawa naba ae Nikutoru ao i aon kawaia ni kainaomataki.

Tao ti akanne moa ara kaongora man ara tabo aio ao e raraba riki te Uea n ana tangira nakoira ni kabane. Alleluia.

Riboti mai Nikunau, Te kakorakora ao ana tangira te Uea

Teweara Tabera, temanna kaain te tiim nako Nikunau man Betio Parish.

Aio ribotin te kakorakora ma kabaroan ana tangira te Uea i aon te aba ae Nikunau are kawari i nanon 11th Turai 2019.

Kain te tiim aika a mananga mai Tarawa bon waniman ba uoman man Betio ao onoman mai Teaoraereke Parish. E noraki ba e rangi ni korakora buakanakin te mananga aio. Tabeua man taian buaka ake a noraki bon tataonan kawarakin Nikunau ao ngke e nang manga boo te mananga ao e a manga taotaonaki te kiba.

E moanaki te makuri ni kabaroan ana tangira te Uea nakoia te nati ni katorika i aon Nikunau n te Kaonobong 13/07/2019 ngkai te Kanimabong 12/07/19 bon te bong nabe n nebonebo i bukin kauringan bongin ana ka 40 n ririki n inaomata abara ae Kiribati.

Ngke e moanaki te kakatauraoi ao e rangi n okioki te ware ae '12' n taian karea, i nanon te nebonebo ao n ana Taeka te Uea n tain te tutia. Ngkai bon ana ware te Uea are e anganira ao a kateaki 12 tiim ni makuri n te tai anne ba waniua tiim a kairaki irouwia kain ara tiim mai Tarawa ao ara tiim ake 4 a bon kairaki irouwia kain Nikunau. E raba te Uea ngkai e kona ni koro nanon naba te kantanning anne. E raba te Uea...Alleluia...Alleluia... Alleluia

Kanoan te katauraoi i main te buti n te Kaonobong 13/07/19 bon te uti n Rotario n te aoa nimaua n te karangaina ao te Tutia n te aoa wanuua. A barongaki tiim n te aoa ruaiwa ao e waki te buti ni kawa ni iteran ruaiwa n te ingabong nabe anne. A tibatibaki tiim ba uoua nako Murubenua ao Tabutoa, teuana nako Manriki, uoua nako Nukumanu ao nikiran tiim ake itiu a buti i aon Rungata ngkai a maiti riki Katorika iaona.

N te Tabati 14/07/19 ao a manga reitaki te makuri ngkai e aki bane inanon te moan bong n makuri are te Kaonobong 13/07/19. Ti karaba tamara Fr Kenny i bukin te kakorakora (katokabai) ma ana karoiroi nakoia kain te tiim i main te kauoua ni buti n te bong anne. E wakinako te kauoua ni buti ni kabaroan ana tangira te Uea ni kababaneaki nikiran auti ake a tuai ni kawaraki ao E rangi n neboaki te Uea ba e a buta ana tangira i aon Nikunau.

N okia kain te tiim n te bong anne ao e a manga reitinko te makuri i bukin kabouan ana taibora te charismatic iaon Nikunau ao ai tibakin ana tangira te Uea mairouwia kain te tiim i muin butiia. Ti karaba te Uea ba angin tenan tibatiba a bon ringaki iai kain Nikunau n ana kamimi te Uea ae batu n aron ringan nanoia man ana taeka ao bai riki tabeua aika a namakina iai te kamaiuaki iroun te Uea. E neboaki aran te Uea n ana mwakuri n tangira!!!



*"...E noraki ba e rangi
ni korakora buakanakin
te mananga aio. ..."*



N te Moanibong 15/07/19 ao e reitinako te makuri ni kawaran mwenga ake a bon roko ni bubuti kainnanoan ana tangira te Uea. Ao ai bon aron naba boong ake i muina n ua okin te tiim; e aki motirawa wetean te tiim i bukin kainnanoan ana tangira te Uea nako aan mwenga.

A tabeka banaia kain Nikunau ni karabaraba nakon te tiim ao riki nakon te Uea ngkai a kakoaua ba E a ranganako ana kamaiu ma ana tangira te Uea i aon abai. I buakon aia maroro ao a bon kaotia ba e bon aki kona n totoki nanoia ni kan nanamakina ana tangira te Uea. A karairaki kain te tiim n te Kaonobong 20/07/19 ao nikiraia n te Moanibong ae 22/07/19.

Ti a karaba te Uea n ana tangira are e a karanganakoa ana kamaiu i aon Nikunau ma te nano are a anga ba a na riki ba ana tabonibai aika korakora mani marurung. Ai bon te karabaraba naba ae batu riki nakon Fr Kenny ni butimwawai ao ni kanakoraoa kanoan ana kamaiu ao ana tangira te Uea ao ai tarira ao manera ni kabane i aon Nikunau. Tina bane n tekeraoi n ana tangira te Uea. E na neboaki Atiniban lesu ngkai e kaotam-waka Otana nakoira, Alleluia!

Taeka n Reirei

Tera ae I riai ni karoia imuin te kainaomataaki?



Tariu ao maneu tao ti bon bane n uringa aron ara tai ni kainaomataaki ke te babetitoaki inanon te Tamnei ae Raoiroi. Tao ti bon namakina te kimareirei ao te kabouaki n ara tangira ma te Uea. Ao bon aio ae riai ni kantaningaki ngkai bon te Tamnei ae Raoiroi ae Ngaia te tia kaboui bai nako ae anganira te Maiu ae Onraken te Maiu ngkana ti taka ao ti kainnanoia. Ma te titiraki ae kakawaki ngkanne: ‘ba ti na kanga ni kateimatoa te korakora ao te kabouaki aio ao tera ae ti riai ni karoia?’

Eng ti anganaki te Tamnei ae Raoiroi ba e aonga n riki n iriko lesu inanora ao ti aonga n riki ba tan kakoaua marakin, maten ao mangautin lesu. Ti anganaki te Tamnei ae Raoiroi ba ti aonga ni kakoaua te kamaiuaki are katauraoia te Atua ibukira rinanon te rairannano ao te tauraoi n tabeki ara kaibangaki ao n iriira lesu ni katoa bong. Ti anganaki te Tamnei ae Raoiroi ba ti na kabuta te Rongorongo ae Raoiroi nako tokin aon-naba ao ti na babetitoia aomata n aran te **Tama, te Nati ao te Tamnei ae Raoiroi**.

Te moani bai ae kakawaki imuin te kainaomataki bon te tauraoi ni kaburei maiura nakon te Uea ao te tauraoi n ongotaeka nakon te Tamnei ae Raoiroi ni kabonganai karea ake ti a tia n anganaki ibukin karokoan ana tangira, ana kamaiu ao ana nanoanga te Atua nakoia aomata nako. Tera ae a karoia abotoro ma reirei imuin te moan Bentekota? E tuangira Ruka ba te bai ae a karoia moan kiritian ake a ruonaki n te Tamnei ae Raoiroi bon te teimatoa ni kawakina ao ni maiuakina aia reirei ao maiuia abotoro; te rereitaki ma taria a maneia; ao te uaia n ototea ao ni katonga te bwerena ni kamaiu.

Kawakinan ao Maiuakinan aia Reirei Abotoro

Ti riai n kananoa ara atatai ibukin te Atua mairouia te koraki ake a tia n reiakinaki taekan te aro ke kain te charismatic ake a maan n te botaki a iai aia karea ni kona n reirei taekan te onimaki. Ti riai naba n reita aio ma kan wawarekan ana taeka te Uea ao te iriiri reirei ao rereua aika a wakinaki man te aro ao te botaki ni charismatic.

Te Rereitaki ma tarim ao manem

Ti ongora rongorongoa moan kiritian ba a teimatoa ni maiuakina te rereitaki ma taria a maneia ao a tibatibai aia bai imarenaia inanon te ibuobuoki ao te itangitangiri. A tauraoi n tibatibai baike a reke irouwia ao a tauraoi naba n tibatibai taian karea ake a tia n anganaki ioun te Tamnei ae Raoiroi ibukin karikirakean rabatan lesu ae te Ekaretia. N aron ae ti tataekinna ao te bai teuana ae raka n te botaki ni charismatic bon ana baintangira te Uea ae bon tarira ao manera. Inanon te reitaki ma tarira ao manera ao ti kakamakura iai ana karea te Tamnei ae Raoiroi ae moan te mwaaka are te kona n riki ba kawain ke te kai-nikawawa ibukin ana tangira te Uea nakoia raora nako. E taku Bauro n ana reta nakoia I-Korinto (1Kor:14:1) ba ti riai n matennanoa maiuakinan te tangira; ma ti na riai n teboakina riki ana karea te Tamnei ba ti aonga ni kona n taetae ni burabeti ni kaota nanon te Atua nakoia aomata. Ngkana ti kan rikirake inanon taian karatia ake ti anganaki n ara tai ni kainaomataaki ao ti riai ni karikirakea te reitaki ae tamara ma tarira ao manera ake a tia n reke irouwia taian karatia aikai ao ni maiu n ibuobuoki ma ngaia ni karikirakei, ni kawakini ao ni kabonganai ana karea te Tamnei ae Raoiroi.

Te uaia n urua ao ni katonga te Bwerena ni Kamaiu n te Eukari ao n Tataro

Inanon ara borau ni maiura aio ao ti bon kainnanoa te amamarake n ana Taeka te Uea ao riki n Rabatan ao Raran lesu ae maiu n te Eukari. Ae kakawaki ba raon aio bon te uaia n reitaki ma tarira ao manera n neneboa te Uea ao n uaia ni katonga lesu ae te Bane ni Kamaiu.

Te Maiu inanon ana kairiri te Tamnei ae Raoiroi

Inanon maiura ni kiritian ao e kakawaki n tai nako ataakina ba ti kainnanoia tarira ao manera ba ti na kaai ni mananga ao n uaia n ibuobuoki inanon kawaira. Ngkana ko kataia ni mananga n ti ngkoe ao ko na bon namakina te rawawata ao te kainnano. Te bai ae kakawaki naba bon te kona ni maiu ao n nakonako inanon te Tamnei ao ana karatia te Atua. Ngkana ti na-

konako inanon te Tamnei ao ti na bon aki maiu ibukin katokan nanon ana kaibabaru te rabata are na kairira nakon karoan te bure, te rau-renako ma te Atua ao te mate ae aki totoki.

Ana Tangira Te Uea

E anganai Otana Kristo n ana Tangira

Mariateresa Tauni, Tiibi Riita Bikenibeu Parish

Arau Kauriri Kaboraa, aran tinau Nei Aana ao aran buu Veronica ao I mamaeka i Bonriki n te kaawa. Iai aman natira, ba 2 ara karimoa aika bwebwe ma a mate ao ara bina naba e mate ao ti a tiku ngkai ma natira are te kauoman.

I nanon au ririki ae 20 tabun ao I rangi n onimakina te riaboro ba a rang maiti buokau mairouna ao I aki toki ni kakabongana kabirau ae bain ara utu are te bai n ibuobuoki nakon te makuri. Iai naba tabu ba I aki kona ni kana te rereba, te nnewe, te baiku ao te on.

I a maninganako ioun teuare e buakaka ao I aki kuba ao I a urui tua ba I onimaki ba iai te tia buokai ae tawe ana buoka. Iai 3 au bus ao au flat screen aika e anganai te I-China ba e rangi n tatangirai n ikotaki ma baai riki tabeua ake I tangiri a bon rereke naba mairouna. I rangi ni baina naba te manging ma te buti n te bus. Iai naba au case ae I orea te aine ma ngke I a tei n te bowi ae rietata ao I aki naba kabureaki ba I kabongana naba kabirau arei. N tokina I urua naba ana taeka Fr Tebwananako are e tabua te rin n te oo irouia manging. Te moan tai are I rin iai ao e a uruaki naba au bus are tewana, ao te kauoua n tai I a manga karoia naba e a manga kuratinaki au kauoua ni bus. E a roko irou te raraoma ao I nako ni kabara au bure nakon te tama are e a katekeroaoi ma e kamatoa ana taeka ba ngkana I a manga oki riki ao e na bon bua au karikirake.

N tokin te tai ao a bane n bua au bus, a bua naba maiuia au utu ao I namakina te mwengabuaka n ikotaki ma te aoraki ae te ang ni mate. I a nako n tutuo n te onnaoraki ao I a kunea ba ngaia bon akea aoraku. E roko irou te tabeaianga ao I a nako n maroro ma tariu are te katekiti ao e a buokai ni bai tabeua ao ni kaungai ba Nna kawaria kain te botaki ni charismatic ao ni bubutia ba a na buokai n au kanganga.

N te katenibong teuana ao I a kaitibo ma maneu ae Nei Rosa ao ti a marorokina au kanganga ngaia are e a kairai nakon aia reitaki n neboneybp n te tariki anne. E rikirake aoraku ma I keiaki ni mananga ngke e imanonoai buu ba Nna riai n iri ibukin buokau. Ngke I a roko n te tabo n reitaki ao e a rangi ni korakora irou te ang ni mate, ai aron ae N nang boni mate. Ngke e a manga waki te neboneybp ao I tangiria ni birinako ma e aki reke au anga ba I ngae ni kabarai baia nake I

taubai ma ngaiia ma a rangi ni matoa ao I aki kona n baranako. E rangi n un nanou ao I teimatoa n rawa ma bon te kamimi ba e a bon onikaki naba nanou anne nakon te tang ae moan te korakora. Ngke e a bara ao ai akea te ang ni mate irou ao I a namakinna ao ni kakoaua ba I a marurung!

Teuana te wiki i muin ringakiu n ana tangira te Uea ao I a moana au kooti n te Maiu ae Onraken te Maiu. I ngae ni baka ma e aki bara nanou ba e teimatoa te namakin are I namakinna ngke e moan katokabai te aba iaou. N au ka-onoua ni wiki ao I a ira te kainaomata are e karoaki i Beteriin n te Pentekota ae nako. Te karea n noraba bon te bai ae I riribaia ao I aki kakoaua ma n tain te kainaomata ao iai baika a noraki iaou ao I namakina te tano ae e baroa ubu ao mai ikanne are I a kakoauai raoi karea aikai ao e rikirake te korakora n ua ngkai.

I a tia ni mena inanon te rotongitong ao I aki ata te kawai ae Nna toua ma E a tia n anganai otana Kristo. E a bitaki nanou ma au onimaki ao au kakoaua n te tai aio e a rangi n raka nakon are mai maina. I a kaki bain te roo ao e a rangi n reke ngkai te rau ni mwengara. E a reke naba te ota irou, ngkana ngkana I tutia ao e aki kona n reke tibangau n te kababarabara ke man ana taeka te Uea ao ngkai I a rangi ni kona n teke n ana taeka te Uea ao I a kona naba ni maroro n te makoro! E raba te Uea.

E toki te un ao e toki te oro

Teruutu Tiaoni, Bikenibeu Parish

Arau Atiou ao aran kainnabau Tabera ao ti mamaeka i Kiboru, Eita. N te bong teuana i nanon namakaina aika nako ao e kaongoira tariu are te rita n te charismatic i aon Eita ba a na nebonebo ni katoi aoraki n ara auti. Ngke e a tariki ao a bane n tauraoi kain ara auti ao ngai ma kainnabau ti a kaman tauraoi naba. E nang bon waaki raoi te nebonebo ngke I a bon un naba ma kainnabau ao I a bon tangira ba Nna oroia ma e aki reke taina ba are e a kakaai ara auti irouia kain te charismatic. I a motikia i nanou ba ngkana e bara ao I a oroia naba. Bon akea atakin unra irouia kain te botaki ake a bane n katobibi i nanon ara auti are teuana. Ngke e nang boo te nebonebo ao ti a bane ni weteaki ao ngai I bon roko ma nanou ae buakaka ba are I un. Ngke a tabeki kunaia i main aia nebonebo ao I mimi ba e a bon onikaki naba te un are i nanou nakon te tang ae moan te korakora. Ngke a katokabai i aora ao I aki ataia ba I a kanga n rurubenebene ao n tang. I ataia ao I namakinna ba e bon ringai te Uea ao I baroaki n ana tangira.

Ngke e a bara te nebonebo ao ngai I a bon rangi n namakina te uki n nano ae korakora. I nako n kainnabau ao I kabara au bure nakoina i bukin kairuau nakoina n au tai n kakamarakia ao n ororie. Man te tai anne ao I a tuanga buu ba ti nang riai n maroroakin ara kanganga i marenara ba e aonga n toki te unun ao te oro irou. Ti a waki i nanon anne ao ti kakaraoia ni katoa tairikin te Tabati koraki. Tao bon ti 4 ke 5 ara Tabati ni maroroakin ara kanganga ao imuina ti a aki ba ti a raba-



*"I nakon kainnabau ao
I kabara au bure
nakoina i bukin
kairuau nakoina n au
tai n kakamarakia...."*



"E tibatiba te karo aio man neboa te Uea n rokoia kain te charismatic ni mwengana"

kau arora.

Tabeua te wiki i muina ao e a reke ara takaramentu ni mare are ti a rang ni maan n iaingoa ma ai bon te angangabuaka naba. Te bai ae l kukurei iai ba e a kukurei kainnabau n irai nakon au aro ngkai bon te kamatu ngaia. N ana berita ngkoa ao e taku ba ngkana ti tia ni mare ao e na manga bon okira ana aro ma e na teimatoa ni boutokaai ni bain au aro.

I muina ao I a tuanga tariu ba n nang wakina au kooti. E a tia n bane au kooti ao I a tia naba ni kainaomataki n te Bentekota ae nako i Beteriin.

E kaoti baika a raba Te Uea n ana karea.

Makurita Baaro, Teaoraereke Parish

Aio ana karaki maneū aio are e bubuti aki kaotan moa arana n te tai aio. I nanon ririki aika a nako ao iai ana tiim te charismatic ae roko i Tabiteuea Meang mai Tarawa ake a reitaki ma kain te charismatic mai Tabiteuea Meang n kawari mwenga ni kabwaroa Ana tangira Te Uea. N kawaran te utu ni katorika teuana iaon Tanaeang ao i nanon te katoka bai i aoia kain te mwenga ao e bon rangi n rawata bwai aika a noraki ni mwengaia irouia kain te botaki ake a roko. E kainaki te tiim aio irouia kain te charismatic ake a roko mai Tarawa n raonaki naba i rouia kain te charismatic mai Tabiteuea Meang.

N te tibatiba i muin te katokabai ao a tibaaki tamnei ma tibanga ake a noraki. E noraki te teinimane ae kakainareke ae benna n te uraura ao e kabarakinna n te mainaina ao e kabaeaki mangaina n te kunikai ae mainaina. E roko teuuae ao e ira buakon te nebunebo ao e katokabai i aon buun natia kain te mwenga. E a manga teirake nakon neiere e noria n tuanga ba e na tuanga ana karo ba e aki mate n te aoraki ba e mate man te bai n riaboro. E tuatua naba ba e na kaongoaki ana karo ba akea ana kanganga ao e mena n te tabo ae rangi ni mwengaraoi iai. E taekinna are e nora te tamnei aei ba te teinimane aio natia kain te mwenga.

E noraki naba i nanon te tataro:

1. te tabanou ae mena i aan bouan te auti mai nuka.
2. Te baa i nanon te baro
3. Te boki n tabunea i nanon te baro riki are teaina, ao
4. Te bai ae taunaki i aan te buia are irarikin te auti.

A rotaki kain te mwenga ao man kakoaua ba iai natia te mwane are e a tia ni mate are boraoi teiteina ma are kababarabaki n te nonori. E mimi te karo ba neiere e nora natina, bon kain te roko mai Tarawa are akea atakin rongorongoia iouna. E taekinna neiere buun natia kain te mwenga ba i nanon tain te katokabai ao e bon taonna rawawan tan te bai are e toka i aona ao e rang ni kainnano n te bumatemate ae kianako boina mai rarikina.

I muin nakoia kain te charismatic ao n aron tuangakia, ao a kena aan bouan aia auti kain te mwenga aio. E reke i aan te boua te ata ke tabanoun te tei ae uarereke. E kenaki naba aan te buia are i rarikin te auti (ana auti teuare e a tia n

mate) ao a kuneaki rinikaokao aika tennai aika a taunaki ni kateaki i nanon te aubunga. A uruaku rokan aia baro ake uoua ake a noraki n tain te tataro. Ni kaukan te baro are te aina are aia ati natia aika a mena i Tarawa, ao a kunea iai te ati ni baa ae irariki ae nangoaki ba e na tei ni baraki i kabin te ati ao are ai bon ti teutana te nikiran kanoana. Kanoan te batoro anne te ira n atu ae karauaki ni minominotaki. I nanon te ati are teuana ao e kuneaki te boki n wawi ao n tiritiri. E kakoaua te karo ba bon akea atakin baai aikai irouia ao a karaba Ana noraba te Uea rinanon te charismatic. A boti baai aikai ni kabane kain te mwenga ao a nikiri irouia kain te charismatic ao te Tama i Tanaeang.

E tibatiba te karo aio man neboa te Uea n rokoia kain te charismatic ni mwengana ba e teretere raoi Ana tangira Atuara ba bon uotaia kain te tiim aio. E a tiba kakoaua raoi ba ngaia bon te oi n tataro aia tataro kain te charismatic ao bon ngaiia taan karanga ana Tangira te Uea rinanon aia tataro. Te utu aio a tia n eutaki ao man kakaanii riki te Uea ao man keiaki n aki baka aia tutia. E RABWA TE UEA N ANA TANGIRA AE KORORAOI.

Tibangara n tain te rereua

E ingainga te nano ni kan manga kaonrakeaki n ana tangira te Uea ma taian karea ake a na manga ranganako mairoun te Tamnei ae Raoiroi n te tai anne. Kanoan te katauraoi i main te tai anne bon te Novena nakon te Tamnei ae Raoiroi are wakinaki 9 te bong i main Bentekota.

Ti karaba te Uea n tain te rereua ba a bon rangi ewa tibangara aika reke. Bon te koaua n tai nako are maitin tibangara ae reke man te rereua bon man ukin ao tauaoin nanora ni butimaea ana baintangira te Uea aika e katauraoi ibukira ba ti na anai ao ni karekei mairouna. Kangti kona naba ni kabotaua maitin te tibanga ae na reke man te rereua ba ai aron te mananga n itiran ao maitin ae na kona n reke e bon irekereke ma buburan nnen am ran ae ko roko ma ngaiia. Ane roko ma te nana ni katura ae uarereke ao bon anne maitin ae na reke iouna. Ngkana ko roko ma te bwaketi ae bubura ao e na bubura naba maitin te ran ake ko na itia.

Aikai tibanga aika reke n tain te rereua irouia tarira ao manera

Uriam Timiti, Bikenibeu Parish

1. Te manga kona n kaitibo ao n reitaki ma tariu ao maneū. Teuana te karea ae l karekeia n tain te rereua bon te kona ni manga kaitibo ma tariu ao maneū aika moan te batiriki bon ake l tataneiai ma ngaiia ma l tuai mani kakaitibo man ngaiia imuin ririki aika bat. I rangi ni kukurei riki ni manga noria kain te charismatic ni kawai ake ti a manga anganaki tibangara n anga reirei inanon tain te rereua.

2. Katongan ana tangira te Uea inanon karoan kawain te kaibangaki. Bon iai ana karatia te Atua ae katauraioi ibukira inanon karoan Kawain te

Kaibangaki. Ngkana ko bon kabanea raoi nanom nako iai ao ko kataia n iangoia ba aongkoia ko bon mena n te tai are rinanon te maraki ao te bainikirinaki iai lesu n te Kawario ao ko na bon anganaki iroun te Uea te karea ni kona n namakina ao ni katonga kororaoi ana tangira lesu nakoim inanon tauraoina ni butimai taian maraki, rawawata, ao bainikirinaki are E onea iai muim lesu n riki ba te tia bure Ngaia. Bon aio te bai ae I karaba iai te Uea n tain karaoan kawain te kaibangaki are I rangi ni kukurei iai ba I ataia ba I rangi ni kakawaki iroun te Uea ao E tangirai lesu ba Nna aki bakataea ana tangira aio ma Nna butimaia ao Nna raira nanou, Nna uouota au kaibangaki ao n iriria ni katoa bong. A bane n roko tibangau aikai inanon te anene imarenan taian tei are “I kainnano I maraki, Ko bia nora arou aei, Ko tangirai ke Ko aki, Ngai ae lesu am Uea”

Te bai are I bon tia n tibaia ma tariu ao maneu n tain te rereua ba ti riai ngaira kain te charismatic ni karekea kawain te kaibangaki ba tiaki ti ara tataro ae ti atongnga ao ni karoia ma ae kakawaki riki ba e na riai n reke Kawain te Kaibangaki ba kairan maiura ke te kawai ae ti na nakonako iai inanon maiura aio. Eng bon ti aio te kawai ae e irariki ae na karokoira n tokin kawaira are bon te maiu ae akea tokina i Karawa. Ti riai ngaira kain te charismatic ni karekea kawain te kaibangaki ba teuana tabera ae ti na kakaraoia tao n te taina n te wiki ke n te moani Kanimabong n aron are kakaraoaki rimoa.

3. 'E kateirakeai lesu ba Nna oki Nakoina ao E Kamaiuai'

Boni ngai kain te charismatic, ai teniuu au ririki ao I tuai man kainaomataki. A maiti au kanganga ngaia I a okira te Uea ao I a wakina au kooti ba I kan kainaomataki n te Bentekota.

I a mama ni manga ira te waki ba are I a bon maan n aki iriri... e a mamara ara utu... akea te maiu n tataro. I mamaaka naba kainnabau ... ma I a aki maku ao I a korakora, ai bon ana tai moa te Uea ba I a baruia, I a batakataka, I a kan karekea tibangau mairouna. E rin angiu ao I ninikoria n roko n ira te Bentekota ao E kaeka takau te Uea. I namakina te korakora, I kamaiuaki, I karonrakeaki, a rang maiti tibangau n ana tangira te Uea man kanoan te reirei ao I namakina te kimareirei are e irianaki ma te tang. Ao I uringaba ba I ataia ae titebo ba I a tia ni kitana te kabaia are I a tia ni mena i nanona are bon te karanga ni karatia ao ngke I a kitanna ao I namakina te mwenga-buaka.

4. Aikai naba talan karea rinanola taan katokabai n te katoki aoraki are n Tabatin te Bentekota

“...I rin I a namakina naba te tanoi....”; “I ongo aran temanna ae aoraki, te cancer, te ranga ae borii....”; “...te taeka ae ‘tibu’...”; Te taeka ae “Maraki n atu ... e a maan ba ai 2 wikina, onimaki a bane ni kamarurungaki akana a onimaki...” N aia tibatiba aoraki ao iai ake a rekereke ma taian karea ake E kaotii te Uea n te tai anne. Aikai aia tibatiba tabeman aoraki ake a reke aia tai n tibatiba n te tai anne. Temanna e taku ba i main manangana ao e ongo te wirikiriki i nanon tan-

ingana ae kangai:

“...tai nako ba bon te kewe aia maan are a na karoao... ”lai te aoraki are e tibaia ba e a tiba oki mai India ibukin aorakin mamaana ba e cancer. Iai naba ae taku ba e namakinna ba e ringaki angana are maraki n te bai ae maitorotoro...lai ae e ongo te anene are “I kainnano, I maraki... ko bia nora arou aei.... E maraki, ao tera boona irou ao iroum? E a nakoim...”

Teburoburo Eita - St Faustina, Betio Parish

5. N ana buoka tinara Nei Maria ao ti kammakuraki, ti Kamaiuaki ao ti kabouaki iroun te Tamnei ae Raoiroi

Bon te moan makoro man te kibu ni kora (Bentekota) aio are e ringa nanou ... kanga ai aron are I ongo banan au Uea i nanou ae taetae ma tinau Nei Maria, “E aki tau neiei i buku (toro)” ma e kangai tinau, “Anganna ba I a buokia”. Ao I ataia ba I a bon aki tau ao I tang... Ma tera riki ana taeka au Uea? Akea, ba E onimakina tinana ni koaua ba e kororaoi n te ongotaeka ao n te kakaonimaki! I aki tau ma bon ana buoka tinau Nei Maria ae katauai, ao n akean ana buoka ao akea te bai ae I kona n karoia! E raba te Uea...Alleluia.



Te Maiu ae Tabu

Arana: Catherine Labouré	Bungiak: 2/05/1806
Mate; 31/12/, 1876 (70)	Ana toa; 28 Novemba,
Santa ibukia; kaara ma aoraki	

Karakinan maiun Santa Katarina

N tarikin te bong ae 2 May, 1806 ngke e tabe n tang te Anera ao e a bungiaki Katarina ao e babeti-toaki n te bong naba are i muina. Bon te karuaman ngaia n ana utu are tengaun ma temanna (11) ikotaia ni kabane irouwia aia karo aika Peter ao Louise Laboure. E mate tinana ngke 9 ana ririki ao i muin te taunimate ao e okira ana ruu Katarina, e toka n te kaintekateka ao e tamarakea te oo n anaa tamnein Nei Maria ao ni kaboria ma ngaia ao e taku: “Man te tai aio ao ko na riki ba tinau.”



“...Akea, ba E onimakina tinana ni koaua ba e kororaoi n te ongotaeka ao n te kakaonimaki!

E moan komunio n Tianuare 25, 1818 ngke 12 ana ririki ao man te tai anne ao e utuuti n te aoa 4 n te karangaina koraki ao e ririanna tabeua te maire nakon te umantabu n ibuobuoki iai i main te tutia ao n tataro naba. N te bong teuana ao e miia te tama ae e a bon kara are e kaira te tutia ao ngke e a bara ao e tara Katarina ao e weteria n tabonibaina ma e rawa Katarina ao e kerikaki. I muina e a manga roko n te



*"Ngke a roko n te
umantabu ao e ringa te
roka te anera ao e
ukinako te mataroa.
...."*

ruu n aoraki ae e mena naba iai te tama ao e taku nakoina, "Natiu, bon te beku ae tamaroa tararuakia aoraki; ko birinako ngkai ma n te taina ao ko na manga nakoioi ma te kukurei. Iai ana baire te Uea i bukim - tai maninga anne!" E aki maan i muin anne ao e manga reke rokona n aia onnaoraki tina n te utu ae Daughters of Charity ao e kuba ngke e tine naba iai tamnein te tama are e noria ni miina. E titiraki ao e kaekaki ba ngaia bon Santo Vincent de Paul, te tama are e katea te utu n tina anne.

N Tianuare 1830 ao e rin Katarina ni katauei ba te tina n aia onnaoraki kain te utu aio i Catillon-sur-Seine. E batu akoakina iroun te Atua ao e maiti te kaoti nakoina. E nora buroon Santo Vincent ni beibeti ao ni bilitaki karana 3 te bong ae e ireiti. N tabetai e manga nora lesu i matan te Eukari ae moan te tabu ao e kakaoti naba nakoina Nei Maria.

N Turai 18 – 19, 1830, te bongina i main ana toa, ao a katoaaki ni makorokoron nako ana kunikai Santo Vincent tiina iroun aia mataniwi ao e kabarabara naba nakoia rongorongan maiuna ae tabu. E kabanea nanona Katarina ni butia St Vincent ba e kan nora naba tinan te Atua ao e namakinna ba e na bon noria ao e matu ma ana koaua anne. E aki maan ao e uti n te oota ae korakora ao banan te teei are e kangai "Te tina Laboure, nakomai nakon te umantabu, e taningaiko te Baretenia ae moan te tabu." E raraoma Katarina ba e rawa n noraki ma e matangare te teei nakoina ao e taku; "Tai raraoma, e a itera tebwi ma teuana, a bane ni matu te koraki... nakomai, i tataningaiko." Ngke a roko n te umantabu ao e ringa te roka te anera ao e ukinako te mataroa. E bane uramakan tauran te umantabu ai aron are e katauraoaki nakon te tutia n te nukanibong. E rinkako ao e katorobubua ngke e a ongo naba tangin te kunikai ae tirika. E tabeka matana ao e nora te Baretenia ba e rangi n tikiraoi ao e kianako otana ao e ongo banana ae kangai, "Iai tabem ae E kan anganiko te Atua. Ko na kaitaraki ma tai maku, a na kabatiaki karatia n aron are ko kainnanoi." I muin buan Nei Maria ao e a kairaki n okira ana ruu iroun te teei. Ngke e a toka n ana kainiwene ao e a bua naba te anera ao e ongo tangin te tai ba e a boo 2 n te karangaina.

N 27/11/1830, te Kaonobong 5.30pm, ao e mena i nanon te umantabu Katarina ma tiina tabeman i bukin aia tataro n te tairiki. E ongo tangin te kunikai ae tirika ao e ataia ba ana kanikina Nei Maria. E tabeka matana nakon te baonikarea ao e nora te aine ae moan baan te tamaroa n tei i aon iteran te aonnaba ao a tiinako mai baina taian oota nakon te aonnaba. E ramaneaki n taeka aika "O Nei Maria ae ko riki i tinanikun te bure, tataro i bukira ngaira aika ti butiko buokara." Ngke e tabe n tarataraia ao e mino te tamnei anne ni kaoti itoi aika 12 ma te man ae M ae taonaki n te kaibangaki, ao 2 Atiniban i aana ba Atiniban lesu ae moan te tabu ao Atiniban Nei Maria ae Immakurata. E titiraki Katarina ba aera tabeua oota ake a tiinako man bain Nei Maria aki roko n

te aonnaba ma e kaeka ni kangi, "Akanne karatia ake a mananipa aomata ni bubuti." I muina ao e manga taku, "Karaoa te metera n aron ae l a tia n kaotia nakoim. Akana a mamaenna a na anganaki karatia aika moan te batu."

N ana kateniua ni kaoti ao e titiraki Katarina ba e na kanga ni karaoa te metera ma e tu angnga Maria ba e na nakon te tama Jean Marie Aladel. E aki kakoaua Katarina te tama aio ma i muin 2 te ririki n tirobaea maiuna mai kiraroa ao e a kariaia. E kawara te Ake Ebikobo are e tua ba a na karaoaki 2,000 metera n Tuun 20, 1832. Ngke a moan reke iouna tibana man metera aikai ao e taku, "A riai ngkai ni kabutaki nako." E butanako te metera aio n te aro ae moan te tawe ao e miaknaki naba aron birimakan tanoatana.

E aki kan kamoamoaki Katarina n rakan akoakina iroun te Atua ma e tangiria n tiku n arona ao e kabanea 46 te ririki n tararuia kaara ma aoraki n aki kakaotia nakoia ba bon ngaia are e anganaki te metera. Tiina ake e maeka ma ngaiia a rangi n karinea ao ni kan memena i rarikina n taa nako. E a kaman ataa naba Katarina ba e na mate i main tokin te ririki 1876. I main matena ao e katauaki iroun Nei Maria ba e na kaota te rongo-rongo are e a tia ni kainna i nanon 46 te ririki ao e nakon ana mataniwi ni kaotia are bon ngaia are e kaoti nakoina Nei Maria. N Ritemba 31 ao e a motirawa man te maiu aio.

N 1933 ao e a butaki rabatana man ruana ao e ngae ngke bon 70 ana ririki ni maiu ao manga 47 riki te ririki n taunaki ao e noraki ba bon akea rotakin rabatana. Kanoan matana a rangi n tikiraoi ao n teimatoa ni buru, baina ma waena a rangi n marau ai aron are e bon karaua ni matu. E kawakinaki rabatana i aan te baonikarea i 140 Rue du Bac, Paris, i aan te tabo are e kaoti nakoia iai Nei Maria.

Kaubain Nei Maria ae Tinan te Atua

Nei Maria Tinan te Atua

Ni kaitara ma ana te toa ae 'Uotakirakean Nei Maria nako Karawa' ao ti reitira ma tarira ao manera ni Kiritian i aonnaba ni karaba ao ni kamoamo te Atua ibukin kororaoi te kamaiuaki ae anganira rinanon Nei Maria ae a tia n rineia ibuakoia aine nako ba e na riki ba Tinan Natina ae lesu are e bungiaki, e maraki, iaon te kaibangaki ibukin kabaran ara bure ao manga karikara ba nati ngaira imuin te karaurenakoaki n aia aki ongataeka ao aia bure ara moan karo.

Ti kakoaua ba rinean ao nnen Nei Maria inanon te Babaire ni Kamaiu aio bon te bai ae a kaman iai mai moana ao tiaki te bai ae manenanti n reke. Nei Maria inanon ana kaeka ae mangori are "ana toro te Uea ae mangori ngai; E na karaoaki nakoioi n ai aron Am Taeka" ao imuin ruonakina ni maakan Teuare moan te Rietata

inanon te Tamnei ae Raoiroi, e riki ni koaua batinan te Atua ngke e riki n iriko inanona lesu ao e maeka te Atua ibuakora. Bon Nei Maria ae a tia n angan lesu arona n aomata inanon birotona ao bon mairoun Nei Maria are a reke iai kinakin lesu ba kanoan Tawita are a kaman taekinna burabeti ba e na otinako mai iai te Messia ae te tia kamaiau aonnaba.

Ibukin katauraaoan Nei Maria n riki batinan lesu ae te Atua ao e anganaki te kaonrakeaki n te karatia n aron are taekinna te akanera are Kabiriera ngke e nikira ana kamauri te Atua nakon Nei Maria are kangai: 'Ko na mauri Maria ae ko onrake n te karatia". Ngkai e onrake Nei Maria n te karatia ao nanona ngkanne ba e bon onrake Nei Maria n te raoiroi, te tamaraoa, te itiaki ao te kororaoi. N te 1854 ao Pope Pio IX e kamatoa ao e katanoata kanoan te onimaki ba Nei Maria ae te Baretenia ae moan te Tabu e a tia n anganaki n ana karatia te Atua ae kaonoti nakoina ao n uan te kamaiuaki are na uotia lesu Kristo, te katanaki man barekan nako te bure ae orikinare ke te bure n riki. Boni man te koaua are te Riki n Immakurata are a kababarabaki iai Nei Maria ba e Imakurata ke e itiaki.

N te toa ae uotakirakean Nei Maria n te 15 Aokati ao ti a kakoaua iai kamimitongin ao baunuenakin Nei Maria irarikin lesu i Karawa ni kaotaki ao ni kamatoaki iai ba boni ngaia Tinan te Atua. E kamatoaki kanoan ana koaua ao ana reirei te Ekaretia aio iroun Pope Pio XII n 1 November 1950 ba Nei Maria ae Tinan te Atua ae e Imakurata ao e aki boo n te bure e anganaki te kamoamoaki ae okoro ngke e uotakirakeaki rabatana ao tamneina nakon kororaoi te mimitong i Karawa. Eng, bon aio kanoan te onimaki are katuruturuaki n te kanimaua ni miterio ni mimitong ba Nei Maria ae Tinan te Atua ao tinara naba e na buobuokira ba ti na teimatoa inanon te karatia ba ti aonga ni katotongnga naba ni baunueanaki n te mimitong i Karawa.

Nei Maria raora n te Ruu are i Eta n tatanninga ruon te Tamnei ae Raoiroi

E koreaki n Makuri I: 14 ba "a bane n reitaki n te nano ae ti teuana abotoro ma tan onimaki ni kakantaninga ruon te Tamanei ae Raoiroi n te ruu are i eta ma aine tabeman ao Nei Maria ae Tinan te Atua...." Eng, ti noria n te kibu aio ba Nei Maria bon temanna mai buakoa aine ma e kateretereaki naba ba Nei Maria bon Tinan te Atua are nanona ba e kakannato riki nakoia aine ake tabeman ao abotoro. Ti a nora ngkanne nnen Nei Maria ae kakawaki inanon te tatanninga n tataro imain ruon te Tamnei ae Raoiroi. Nei Maria are tei ngkoia irarikin lesu ian te kaibangaki ba te karea nakoira n te kamaiuaki are kakoroaki bukina iaon te kaibangaki, boni ngaia ae raonira naba ba ti na tauraoi ni butimaea te Bentekota ae bou are ena onikira ao ni kamatoaira n riki ba taan kakaaua marakin, maten ao mangautin lesu man te

mate. Eng e bon riai ba Nei Maria are a tia ni ruonaki ao ni kaonrakeaki ni Maakan Teuare Moante Rietata rinanon te Tamnei ae Raoiroi n te Kaotitaeka boni ngaia ae na raonira n ara tataro ni katauraoi ni butimaea te Tamnei ae Raoiroi.


Tariu ao maneu tera n ami iango oin te kantanninga n te bai ae riki n tain te Kaotitaeka ao te Bentekota? I bon irou ao te bai ae a reitaki iai karaki aika uoua aikai bon Nei Maria ae bon ngaia ae riki ba tinara ni koaua ae katauraoirakon kororaoi ana kamaiu te Atua. Bon Nei Maria are riki n iriko inanona lesu ae te Atua te Nati n maakan te Tamnei ae Raoiroi bon ngaia tinara ae a manga buokira ni katauraoirakon kororaoi ni butimaea te Tamnei ae Raoiroi ba ti aonga ni kaonrakeaki ni kororaoi te maiu n Atua ae bon te Maiu ae Onraken te Maiu. Ba lesu are riki n iriko inanona Nei Maria ao E bungiaki nako aonteaba i Beterem, E a manga bungiaki ngkai nako nanora n tain te Bentekota. Nei Maria are bon te moan aomata ni katonga kororaoi kaubain te Atua ae te Teniman n Temanna n te Kaotitaeka bon ngaia are buokira ba ti na manga katonga kaubain te Maiu n Atua anne n tain te Bentekota ngke ti ruonaki ao ni kaonrakeaki n Tamnein lesu. E taku temanna te tama ae kaira te rereua ae liria i Biti n ririki aika nako baki e mena iai Nei Maria ao e na ruo ao ni makuri iai te Tamnei ae Raoiroi. Are nanona ngkanne ba ti kainnanao Nei Maria ba e na mena ibuakora ba e aonga ni inaomata ao ni mmakuri inanora ao ibuakora te Tamnei ae Raoiroi.

Korakoran Te Korona – E RIAON TE ATOM BOOM

N tain te kauoua ni buaka n te aonnaba ao a kabakaki 2 atom boom iaon Tiaban ba teuana i Hiroshima ~~ao~~ teuana i Nagasaki ike e rang korakora te urubeke ma te kabuanibai are e a reke mai iai. Ma a kaoti kamimi i buakon te kabuanibai anne ba iai uoua tabo ake aki rotaki nte kabuanibai anne ba tabo ake a kabongana te korona ni katoa bong!

Ni moan ingabongin (8.15am) te bong ae 6 n Aokati, 1945, ao e a kabaka ana boom ae makaroiroi Amerika iaon Hiroshima, ao n 9 Aokati 1945 e a manga kabaka i aon Nagasaki i Tiaban.

I nukan te urubeke ae moan te korakora ao e tei teuana te auti n aki uruaki e ngae ngke ti



"Ma a kaoti kamimi i buakon te kabuanibai anne ba iai uoua tabo ake aki rotaki"



"Te kamimi ba i nukan te urubeke anne ao e tei n aki uruaki aia auti kain te utu ae te Jesuit ..."

To pray the Rosary is to hand over our burdens to the merciful hearts of Christ and His mother.


St. John Paul II

waniua auti imarenana ma te tabo are e baka iai te boom. A bane ni bobukitaua auti ake a menu i nanon 1 te maire ni katobibia te tabo are e baka iai te boom ao a bane naba ni mate aomata aika e nakon 60,000 maitia. Te kamimi ba i nukan te urubeke anne ao e tei n aki uruaki aia auti kain te utu ae te Jesuit ao n akea naba temanna i buakoia ake waniman n rotaki ke n bua maiuna n te kabu-anibai anne. N Aokati 15, 1945 n te toa are Uotakirakean Nei Maria nako Karawa ao a tuangaki tautian America ba a nang katoka aia kakati/ buaka.

N ana karaki te tama Schiffer, temanna mai buakoia tama ake a maiu n te tai anne, ao e taku ba n okina man ana tutia n te ingabong anne ao e tekateka n te taibora n amarake, ao e a bon tiba karea wina ngke e a bon kia naba te ota ae moan te korakora. E taku n ana iango ba tao e a rebwetaua te uabu are a kakabongana ana tabo-mariin Tiabaan n b'aa iai. E taku, "E rina n rebetaua aonteaba n te aro ae moan te korakora. I tabekakirake man au kaintekateka, I buriburitaki, I ioioaki, ao I ororeaki man minominotaki kanga te banikai ae ukukaki n te ang". Ngke e a kaurea matana ao e a wene i aontano, e tarataranako ma akea te bai ae tuka matana ba a bane ni baka auti ma kateitei ake i rarikina. A bane n bebete aron ikoakia ake a reke n te tai anne ao ngaia e taku ba ikoakina ti teketeke kamouna ni maibibin kiraati.

A rangi ni maiti aika a mimi ao aki kakoua te bai are e riki nakoa tama aikai ao a anaki aia rongorongo man tabo ni kareke rongorongo ma taan rabakau ma taokita aika a kakaokoro. E taku te tama Schiffer ba e riaon 200 ana tai n anaki ana rongorongo ti i bukin te bai are riki anne. N ana kababarara te tama Schiffer i bukin aki rotakia man te rebwetaua anne ao man boitinha (radiation) ao e taku; "Ti mena i aan ana katantan te Atua ae e onoti i bukina ba ti maiuakina te rongorongo are mai Fatima. Ti korona ni katoa bong n te auti anne"

N 9 Aokati 1945 ao e a manga kabakaki naba te atom boom i aon Nagasaki, te tabo ae kinaki ba kanga atun te Katorika i aon Tiaban. Aio aia tabo kain te utu ae te Franciscan are e kateia Santo Maximilian Maria Kolbe. E ngae ngke e urubeke naba te kawa ae bubura aio ma a bon aki naba rotaki aia auti kain te utu aio ma mwengaia.



Ngke e moan katea ana tabo aio St Maximilian ao e aki kan ongo ngke e tuangaki ba e na katea ana tabo n te tabo ae aoraoi ao e kaan ma te kawa ao e nako ni kateia i akun te maunga. Ngke e a rebwetaua te atom boom ao bon te maunga are e otangana aia tabo taari (Marian Friary) aikai man korakoran te atom boom anne. Te tabo naba aio e katanaki iroon tinara Nei Maria i bukina ba taari aikai a tatarona naba te korona ni katoa bong!

Taiaoka n maiuakina te rongorongo are anganira tinara i Fatima; tatarona te korona (5 te bw) ni katoa bong, m'aena te tikabura ao kaea te tutia n te moan kaonobong koraki.

Te Tataro Imuin te Komunio

Eng bon aio teuana ara tataro ni Katorika ae ti aki toki n atoatonga n te tutia ae boni kaineti ma marewen ara onimaki ni Katorika are bon katongan Rabatan ao Raran Iesu ni koaua n te Eukari n tain te komunio.

N aron ongongorau n anaakin te tataro aio ao n tabetai ao boni iai iroo te tabeaianga ba titebo ma ti aki ota raoi ba tera raoi nanon ara tataro. I kani kaeta raoi te ota n nanon te tataro aio ni kaotia ba bon aio te rai taeka man te tataro n Imatang ao I taku ba e na ibuobuoki noran taekana n Imatang ma te Kiribati ba ti aonga ni kaeta raoi aron otara ao anaakina n IKiribati.

Tataro Imuin te Komunio

Tamnein Iesu Kristo katabuai

Rabatan Iesu Kristo, kamaiuai

Raran Iesu Kristo, kaonrakeai

Ranin rarikin Iesu, Kristo tebokai,

Bation Iesu Kristo kakorakorai,

Iesu Kristo ae moan te Raoiroi, ongo iroo

Inanon ikoakim karabai

Tai katauai ba Nna raurenako ma ngkoe

Mairoun au karirbai ae iowawa, kawakinai

N tain mateu, weteai

Ao tuua ba Nna nakoim

Ba I aonga n neboiko ma kain karawa

N te tai are aki toki, Amen

Soul of Christ, sanctify me,

Body of Christ, save me.

Blood of Christ, inebriate me.

Water from the side of Christ, wash me.

Passion of Christ, strengthen me.

O Good Jesus, hear me.

Within your wounds hide me.

Permit me not to be separated from you.

From the wicked foe, defend me.

At the hour of my death, call me

and bid me come to you

That with your saints I may praise you

For ever and ever. Amen.